

## ■ CONVIVENZA

# Ina buna istorgia na pretenda nagina fin enconuschenta

DAD ANNA NEGRINI\*

**L**a strietta», «Harry Potter», «Pippi Socalunga» e «Turna Pepino» èn mo in pèr classichers da mia uffanza. Quai èn istorgias che tuts enconuschan. Jau hai legì ina massa istorgias, cura che jau era pitschna ed jau fascheva quai fitg gugent. La fin d'in cudesch u d'ina istorgia interessanta anima-va mai da leger in cudesch, tuttina quant gross ch'el era. Mintgantant gievi perfin uschè lunsch che jau legeva gia a l'entschatta la fin, cunquai che jau era uschè tendida e vuleva savair co ch'i va a fin cun il protagonist. Il segund cudesch da Harry Potter, scrit da J. K. Rowling, hai jau cumenzà a leger ed jau vuleva exnum savair, sch'el survivia, uschia che jau hai legì la fin gia curt suenter l'entschatta. Natiralmain è la tensiun alura ida a perder durant leger, schegea che l'istorgia era interessanta. I mancava la pussaivladad ch'i dettia ina surpraisa nunprevisa.

**N**us umans vulain d'ina vart gia enconuscher la fin avant che avoir passentà quai ch'è necessari per enconuscher ella. Da l'autra vart vulain nus però tuttina avoir ina surpraisa. Tuts dus n'è natiralmain betg pussaivel.

**D**entant ma dumond jau, sch'ina fin nu-



nenconuschenta avess dad esser il motiv per leger in cudesch u guardar in film. Sch'ins dumonda in enconuscher che ha gia vis in film co ch'el va a fin, dattan ils pli paucs ina resposta. Il motiv è ch'ina fin nunconuschenta procura per tensiun durant l'entira istorgia.

**N**ossa vita pudess ins cumparegliar cun in'istorgia. Mintga di cun-continain nus da scriver l'istorgia – nossa istorgia personala. Jau m'imaginesch in gross cudesch plain paginas alvas che spetgan da vegnir emplenidas. Il cuntegn dals chapitels determinain nus dentant sez. Mintgin da nus decida per gronda part sez, tge chapitels che fan part da sia istorgia e quai senza enconuscher la fin. I dat però natiralmain er eveniments che nus na pudain betg influenzer.

**J**au crai ch'ina gronda part da nus sa dumonda

adina puspè co che la fin vegn a vesair ora. Quai è la natira da l'uman. Dentant èsi blier pli impurtant che nus guardain d'emplenir uschè bain sco pussaivel las paginas dal cudesch. In cudesch mez vid na po betg avoir ina buna finiziun ed insumma nagina surpraisa.

**V**ulain nus propi savair tge ch'ans spetga a la fin avant ch'igl è insumma uschè lunsch? Sche jau scriv ina columna u in'istorgia sco quai che jau hai da far per mia lavur da diplom, alura ma confruntesch jau insumma betg cun la fin. Lezza resulta successiva-ment cun scriver. En nossa vita resulta quella cun viver.

**\*Anna Negrini è creschida si a Savognin. Ella ha fatg la matura bilingua e studegia a la Scuola auta da pedagogia dal Grischun.**

## Vocabulari

istorgia – Geschichte  
pretender – bedingen, erfordern  
La strietta – Die kleine Hexe  
Pippi Socalunga – Pippi Langstrumpf  
uffanza – Kindheit  
tendi – gespannt  
schegea – obwohl  
procurar per – sorgen für  
cumparegliar – vergleichen  
empleni – gefüllt, ausgefüllt  
determinar – bestimmen  
eveniment – Ereignis  
vesair ora – aussehen  
mez vid – halbleer

Unterstützt von der  
Lia Rumantscha



Lia Rumantscha